

13/09/2003

50 pusat khidmat komuniti ditubuh

KERAJAAN akan menubuhkan 50 pusat khidmat komuniti di kawasan berisiko tinggi jenayah dan masalah sosial sering berlaku bagi menangani gejala sosial yang semakin berleluasa.

Perdana Menteri, Datuk Seri Dr Mahathir Mohamad ketika membentangkan Bajet 2004 berkata gejala sosial yang kian membimbangkan perlu dibendung dan diatasi segera terutama di kalangan remaja yang bakal menjadi pemimpin pelapis pada masa depan.

"Sejak akhir ini, hampir setiap hari kita mendengar dan membaca berita gempar gejala sosial di media massa seperti kumpulan militan, pembunuhan kejam, penculikan, kongsi gelap, kezaliman 'loan shark', sumbang mahram, dadah dan penyakit HIV/Aids.

"Tetapi apa yang lebih membimbangkan ialah gejala keruntuhan moral dan kes jenayah di kalangan remaja terutama mereka yang masih di bangku sekolah. Kita kini mendengar pembunuhan yang dilakukan kanak-kanak bawah umur, anak muda yang lari dari rumah, peras ugut, ponteng dan gangsterisme di kalangan murid sekolah," katanya.

Beliau berkata, gejala sosial yang melanda remaja hari ini adalah disebabkan pengaruh televisyen dan internet yang tidak terkawal yang mencerobohi dan merosakkan pemikiran masyarakat serta mencemari nilai murni budaya tempatan.

Sehubungan itu, katanya, kerajaan berazam untuk meningkatkan usaha membanteras gejala negatif sosial termasuk menyediakan pusat komuniti di kawasan berisiko tinggi.

Bagaimanapun, katanya, usaha bagi membentuk sebuah masyarakat Malaysia yang berakhlak dan bermoral tinggi bukan hanya tanggungjawab kerajaan sebaliknya semua pihak perlu berganding bahu bagi menjayakan usaha berkenaan.

"Kerajaan berazam untuk meningkatkan usaha membanteras gejala negatif sosial, khususnya di kalangan remaja sejajar dengan pelancaran Dasar Sosial Negara yang berasaskan kepada pembangunan sosial berteraskan nilai murni dan peningkatan keupayaan insan bagi mencapai perpaduan dan kestabilan sosial.

"Namun, keluarga terutama ibu bapa dan masyarakat perlu bersama bertanggungjawab dan memainkan peranan masing-masing membentuk golongan muda yang baik tingkah laku, mengamalkan cara hidup sihat, berdisiplin, berilmu pengetahuan dan kukuh daya pemikiran serta menghayati ajaran agama," katanya.